

# INUIT ATAQATIGIIT INATSIARTUNI



UKA2025/145-147

17. Okt 2025

Nivi Rosing

**Pisortat suliffeqarfiutaanni tamani inuttassarsiuussinerit suliamut tunngasumik piginnaasaqarnissaat piumasaqaataassaaq, kalaallit oqaasinik piginnaasaqarneq ilanngullugu kiisalu kalaallit kulturianut kalaallillu inuiaqatigiivinut ilisimasaqarnissaat pillugit Naalakkersuisut Inatsisartunut inatsisissamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Inatsimmut siunnersuut UKA2026-mi kingusinnerpaamik saqqummiunneqassaaq.**

(Inatsisartuni Naleqqap Gruppia, Naleraq)

**Pisortat ingerlatsiviini kalaallit oqaasiisa pisortatigoortumik atuutsinneqalernissaasa saniatigut oqaatsit nutserneqartarnissaannut piumasaqaatip peersinneqarnissaa pillugu Naalakkersuisut allannguutissamik siunnersuummik suliaqaqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq Pele Broberg, Naleraq)

## **Imm. 145-mut oqaaseqaat.**

Siullermik Naleraq inatsisartut gruppiannut siunnersuummut qujarusuppugut.

Inuit Ataqtiginni pingaartipparput pisortat suliffeqarfiutaanni inuttassarsiuinermi pingaartinneqassasoq Kalaallit qinnuteqartut sallinneqassasut aamma pisortat suliffeqarfiutaanni atorfinitsitsiniaanermi soorunami Nunatsinni nunaqartut saaffiginnippalaarlugit atorfinitsitsiniaasoqassasoq.

# INUIT ATAQATIGIIT INATSIARTUNI



Pingaartipparputtaaq Nunatsinni pisortat suliffeqarfiutaanni Oqaatsitinnik kulturitsinnillu pikkorissarsinnaaneq periarfiussasoq, Kommuneqarfik Sermersuumi integrationspolitik assersuutaalluarpoq.

tassanimi atorfillit oqaatsitinnik kulturitsinnilu pikkorissaanerit ingerlasarput.

aamma Inuit ataqatigiinni tunngaviusumik naleqartitaraarput Nunaqavissut atorfinni tamani, qaffasissut pingaartumik Nunaqavissuniik atorineqassasut. Pingaartikkatigut Nunat Allat naatsorsuutiginnarnagit immitsinnut napatissasugut, Namminiilivinneq tamakkiisumik anguniarlugu. Immitsinnut siunissamut aningaasaliinerussaaq nunami najugaqartut najukkaminni atorfeqarnikkut ineriartortinneqarpata.

Pingaartipparputtaaq atorfinitsitsineri qinnuteqartunik sullissisut Kalaallinik ilaqartuarnissaa. Peqatigisaanittaaq pingaaruteqarpoq suliamut tulluarnumik piginnaasaqarnissaq. Piginnaasat naammassisinnaasallu aalajangeeqataasussaapput suliammi pineqarmata. Matuani pisortat suliffeqarfinni inuiaqatigiinni ilisimasaqarneq avaqqunneqarsinnaanngitsoq isumaqarpugut. Atorfimmik allagaqarsiussisoqatillugu inuiaqatigiinnut ilisimasaqarnissaq aamma kalaallit oqaasiinik piginnaasaqarneq qanoq piimasaqaateqarnera ullumikkummita atorineqartarpa? Kalaallit oqaasiinik piginnaasaqarneq qanoq paasisassaava? Oqaaseqarneq immaqaluuniit oqaatsit "aluu" immaqaluunniit "inuulluarit" piginnaanerusariaqartut? Apeqqutit taama ittut ataatsimiititaliamut qulaajartissallugit pissusissamisoorpoq.

Inuit Ataqatigiit isumaqarput atorfinitsitsinerit ataatsimut isigalugit paasissutissat amerlanngitsut. Ass. Naalakkersuisoqarfinni ilisimannngilarput atorfinitsinerit qassit nunaqavissunik atorfigineqarnerisut qassillu atavaaniit atorfinitsinneqartarnerisut. Isumaqarpuguttaaq Naalakkersuisoqarfiit

# INUIT ATAQATIGIIT INATSIARTUNI



ilinniarfeqarfiit      suleqatigalugit      inuusuttut      sulilernissaannut  
aqqutissiuussiuinissamut pisussaaffeqartut. Naalakkersuisut siulittaasoqarfiat  
Sulisunik Ineriartortitsinermut Immikkoortortaqqarfeqarpoq, sulisut qulaaluat  
sulisuusut takuneqarsinnaavoq, suliaasa suuneri nassiuarneqarsimapput  
suliaalli anguniagaallu soorpiaanersut takuneqarsinnaanatik. Sulisut  
qularnanngitsumik suliaminnut pikkorissuunerat qularinngilarput, Inuit  
Ataqatigiinniilli isumaqarpugut suliaasa suuneri takuneqarsinnaasariaqartut.  
Taakkuusariaqartullu ersarsarissumik takussutissiisut atorfinittarit qanoq  
inissinanerannik. Paasissutissat annerusut qaqilerlugit sammineqartariaqarmata  
taamak naatsumik oqaaseqarluta siunnersuut ataatsimiititaliamut  
ingerlaqqinnissaa innersuussutigaarput, oqallinnissamullu qilanaarluta.

## **Imm. 147-mut oqaaseqaat.**

Siullermik siunnersuuteqartumut Pelé Broberg Naleqqaminngaanniit Inuit  
ataqatigiit qujapput.

Isumaqataavugut nutserinermi allaffissornerujussuaq akisuujusoq.

Inuit Ataqatigiinni isumaqarpugut allakkat tamarluinnarmik nutserneqartarneri  
qulaajagassaasoq, Kalaallisut oqaatsivut inatsisitsinni kisiartaallutik  
atorneqassasut pisortatigoortumik allaqqavoq.

Inuit ataqatigiinni isumaqarpugut suut tamarmik nutserneqartarnerat  
akisuujusoq tamatigullu taamaaliornissaq pisariaqanngitsoq.

Nunatsinni oqaatsitta atorneqarnissaata annertunerulernissaa uatsinniippat-  
kalaallisut oqaaseqartuni, allallu tamanna suliarisinnaanngilaat. Uagut  
pikkorinnerusariaqarpugut      oqaatsitta      atornissaanut  
ataqqineqarnissaannullu. Allaalluunniit      Nunatsinni  
ilinniarnertunngortoqarsinnaanngilaq Kalaallisut oqaatsivut tamakkiisumik  
atorlugit. Taamaammat suliassaqarpugut. Ilinniarnertuunngorniartinnit

# INUIT ATAQATIGIIT INATSIARTUNI



ilinniartitsisut takornartat oqaaseqartut amerlapput, siunissami nunaqqatitta paarlakkumaaraat anguniagassaavoq.

Anguniagaq isumaqatigaarput, kisianni anguniagaqaraanni alloriarfissat qaangeraannarnagit ajunngitsumik inuiaqatigiinnut pisuunnguutaasumik anguneqarnissaat pingaartipparput. isumaqarpugut piaarnerpaamik oqaatsivut atorlugit ilinniarnertunngorsinnaaneq salliullugu suliniuteqassasugut.

Qanoq oqaatsivut siuarsarsinnaavagut? Immitsinnut qiviartariaqarpugut. Inatsisartuni sulinitinni kalaallisut oqaaseqartarpugut, taamaammat Inuit Ataqatigiit isumaqarput suleriaasitsinni tamanna aamma atuuttariaqartoq. Allattoqarfigut kalaallisut ingerlatsipput, sooq ilaasortatut siunnersuutigut tunniunneranni aamma danskisut nutsertittariaqarpagut? Taamaammat manna iluatsillugu uagut qanoq iliuuseqarsinnaanerput apuuppara, suleriaaserpummi tamattaalluta akuerisaraarput, uaguuvorlu allanngussappat alloriaateqartitsissaguttalu iliuuseqartussat.

Nalilersuinerit pisariaqarput, qulaajartariaqarpagut suut pisariaqavissumik nutserneqartariaqartut? Ass. Raatiukkut pisat nalunaarutiginiissaanut immersueqqusissutit aamma nutserneqartariaqarpat?

taamak oqaaseqarluta siunnersuut ataatsimiititaliamut ingerlaqqinnissaa innersuupparput. Tassanilu qulaajagassat tamakkiisumik nalunaarsorneqassammata.

Qujanaq.